

## Banc Bia

**Ceist 1** Beidh tú ag féachaint ar ball ar thuairisc faoi bhanc bia i gCorcaigh. Sula bhféachfaidh tú ar an mír, an féidir leat féin agus an duine in aice leat brí na bhfocal agus na bhfrásaí seo a aimsiú?

1. ag freastal \_\_\_\_\_
2. ag fulaingt \_\_\_\_\_
3. i ngreim ag an mbochtanas \_\_\_\_\_
4. ar an meán \_\_\_\_\_
5. tionóntaí \_\_\_\_\_
6. ag streachailt \_\_\_\_\_
7. costais mhaireachtála \_\_\_\_\_
8. ar bhonn seachtainiúil \_\_\_\_\_
9. deontais \_\_\_\_\_
10. an earnáil ardoideachais \_\_\_\_\_



Féach ar an mír den chéad uair le feiceáil an gcabhróidh sé sin leat iad a thuiscint.

**Ceist 2** Féach ar an mír den dara huair agus freagair na ceisteanna thíos:

1. Cé a chuir an banc bia ar bun?
2. Cén fáth ar cuireadh an banc bia ar bun?
3. Cad a dúirt Naoise Ó Cruadhlaoi faoi chruatan airgeadais na mac léinn?
4. Cad a dúirt Naoise Ó Cruadhlaoi faoin deontas 'Tacaíocht Chomhchoiteann do Mhic Léinn in Éirinn' (nó SUSI, mar is fearr aithne air)?

**Ceist 3** '... Coláiste na hOllscoile, Corcaigh...'

Cén Ghaeilge atá ar na hollscoileanna seo a leanas:

University College Dublin  
NUI Galway (National University of Ireland, Galway)  
University of Limerick

Dublin City University  
Queen's University Belfast

**Ceist 4** '...as an mbanc...'

- A. Féach ar an mír arís agus breac síos gach sampla inti den tuiséal tabharthach (alt + réamhfhocal) uatha.
- B. Scríobh amach arís iad sa Chóras Ultach (nó Córas an tSéimhithe, mar a thugtar air).
- C. Déantar cumasc idir an réamhfhocal agus an t-alt san uimhir uatha leis na réamhfhocail seo: *de, do, faoi, i* agus *ó*. 'San áireamh' a bhí le cloisteáil sa mhír. Líon isteach na bearnaí thíos. Tá an chéad cheann déanta duit.

i	+	an	=	sa (san roimh ghuta nó f + guta)
de	+	an	=	_____
do	+	an	=	_____
faoi	+	an	=	_____
ó	+	an	=	_____

**Ceist 5** '... in aghaidh na míosa...'

Bain amach na lúbíní agus cuir an fhoirm cheart den ainmfhocal sna bearnaí.

le linn (an rang):	_____
ar feadh (an lá):	_____
i gcomhair (an mhaidin):	_____
in aghaidh (an bochtanas):	_____
i rith (an oíche):	_____

**Ceist 6** Pléigh na ceisteanna leis na daoine eile i do ghrúpa:

- 1. Ar cheart go mbeadh oideachas tríú leibhéal saor do chách?
- 2. Cad iad na fadhbanna is mó a bhíonn ag mic léinn tríú leibhéal nuair a thosaíonn siad ar an ollscoil ar dtús?
- 3. Conas a bhíonn saol na meánscoile éagsúil ó shaol na hollscoile?

**Treoracha agus Freagraí**

**Ceist 1**

1. ag freastal	<i>attending, at</i>
2. ag fulaingt	<i>suffering</i>
3. i ngreim ag an mbochtanas	<i>in the grip of poverty</i>
4. ar an meán	<i>on average</i>
5. tionóntaí	<i>tenants</i>
6. ag streachailt	<i>struggling</i>
7. costais mhaireachtála	<i>living costs</i>
8. ar bhonn seachtainiúil	<i>on a weekly basis</i>
9. deontais	<i>grants</i>
10. an earnáil ardoideachais	<i>the higher education sector</i>

**Ceist 2**

Féach an script.

**Ceist 3**

University College Dublin – an Coláiste Ollscoile, Baile Átha Cliath  
NUI Galway (National University of Ireland, Galway) – OÉ Gaillimh (Ollscoil na hÉireann, Gaillimh)  
University of Limerick – Ollscoil Luimnigh  
Dublin City University – Ollscoil Chathair Bhaile Átha Cliath  
Queen’s University Belfast – Ollscoil na Banríona, Béal Feirste

**Ceist 4**

A.

- as an mbanc bia
- ar an Ollscoil
- ag an mbochtanas
- ar an méid
- ar an meán
- ar an gcéad dul síos
- san áireamh
- ar an gcíos
- leis an gcostas maireachtála
- as an tseirbhís
- ar an earnáil
- leis na costais mhaireachtála

B.

- as an bhanc bia
- ar an Ollscoil
- ag an bhochtanas
- ar an mhéid
- ar an mheán
- ar an chéad dul síos
- san áireamh
- ar an chíos
- leis an chostas maireachtála

- as an tseirbhís
- ar an earnáil
- leis na costais mhaireachtála

C.

i	+	an	=	sa (san roimh ghuta nó f + guta)
de	+	an	=	<b>den</b>
do	+	an	=	<b>don</b>
faoi	+	an	=	<b>faoin</b>
ó	+	an	=	<b>ón</b>

**Ceist 5**

le linn **an ranga**

ar feadh **an lae**

i gcomhair **na maidine**

in aghaidh **an bhochtanaís**

i rith **na hoíche**

**Ceist 6**

Is féidir gach beirt a chur ag déanamh an phlé seo agus ansin cuid de na tuairimí a phlé leis an rang iomlán.

**Siún Nic Gearailt**

Tá suas le 20 mac léinn ag baint úsáid as an mbanc bia atá bunaithe i gColáiste na hOllscoile, Corcaigh gach seachtain. Deir Aontas na Mac Léinn go bhfuil go leor daoine óga atá ag freastal ar an Ollscoil i gCorcaigh ag fulaingt agus go bhfuil cuid acu i ngreim ag an mbochtanas.

**Marian O’Flaherty**

Tháinig méadú 7% ar an méid cíosa a bhí á íoc ar lóistín i gCathair Chorcaí an bhliain seo caite. De réir figiúirí nua-fhoilsithe, €1,177 in aghaidh na míosa an méid cíosa ar an meán atá á íoc ag tionóntaí i gCathair Chorcaí, beagnach €300 in aghaidh na seachtaine. Agus, tá sé seo ag cur isteach go mór ar dhaoine óga a thagann go Corcaigh chun freastal ar an Ollscoil.

Mar sin, bheartaigh Aontas na Mac Léinn i gColáiste na hOllscoile, Corcaigh, banc bia a bhunú.

Tá an banc bia lonnaithe anseo ag foirgneamh Aontas na Mac Léinn in UCC.

**Naoise Ó Cruadhlaoi, Oifigeach Leasa, Aontas na Mac Léinn**

Ar an gcéad dul síos, is fadhb mhór é cruatan airgeadais do mhic léinn na tíre seo, mic léinn in UCC san áireamh. Bíonn daoine ag streachailt leis na costais mhaireachtála agus tháinig méadú 7% ar an gcíos i gCorcaigh anuraidh. Cuireann sin an-chuid brú ar dhaoine agus is fíor a rá go bhfuil daoine ag streachailt leis an gcostas mairachtála.

**Marian O’Flaherty**

Tá suas le 20 mac léinn ag baint úsáid as an tseirbhís ar bhonn seachtainiúil ach tá an uimhir sin ag méadú. Fadhb eile, a deir mic léinn i gCorcaigh – nach bhfuil méadú tagtha ar dheontais SUSI le beagnach 8 mbliana.

**Naoise Ó Cruadhlaoi, Oifigeach Leasa, Aontas na Mac Léinn**

Tháinig laghdú 43% ar mhaoiniú ardoideachais sa tír seo le deich mbliana anuas. Tá sin ag cur an-chuid brú ar an earnáil ardoideachais agus níl na deontais SUSI ag dul in airde leis na costais mhaireachtála.

Marian O’Flaherty, Nuacht TG4 i gCathair Chorcaí